



23 Mac 2018
23 March 2018
P.U. (A) 81

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN SURUHANJAYA PENERBANGAN MALAYSIA (CAJ PERKHIDMATAN PENGAWALSELIAAN) 2018

MALAYSIAN AVIATION COMMISSION (REGULATORY SERVICES CHARGES) REGULATIONS 2018

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA SURUHANJAYA PENERBANGAN MALAYSIA 2015

PERATURAN-PERATURAN SURUHANJAYA PENERBANGAN MALAYSIA
(CAJ PERKHIDMATAN PENGAWALSELIAAN) 2018

PADA menjalankan kuasa yang diberikan oleh perenggan 18(2)(fa) dan 98(2)(k) Akta Suruhanjaya Penerbangan Malaysia 2015 [*Akta 771*], Suruhanjaya membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Suruhanjaya Penerbangan Malaysia (Caj Perkhidmatan Pengawalseliaan) 2018**.

(2) Peraturan-Peraturan ini mula berkuat kuasa pada 1 Mei 2018.

Tafsiran

2. Dalam Peraturan-Peraturan ini, melainkan jika konteksnya menghendaki makna yang lain—

“perkhidmatan udara luar bandar” ertinya perkhidmatan udara tidak ekonomi yang dijalankan di dalam suatu wilayah di dalam Malaysia yang terpencil atau kurang penduduk atau mempunyai isu perhubungan yang signifikan oleh sebab kepinggiran geografinya atau kekurangan pilihan pengangkutan darat yang mencukupi;

“syarikat penerbangan” ertinya—

(a) pemegang lesen perkhidmatan udara atau permit perkhidmatan udara yang dikeluarkan oleh Suruhanjaya;

(b) pemegang lesen atau permit yang dikeluarkan di bawah Akta Penerbangan Awam 1969 [*Akta 3*] atau Peraturan-Peraturan Penerbangan Awam 2016 [*P.U. (A) 97/2016*]; atau

- (c) seseorang yang dibenarkan untuk mengendalikan suatu perjalanan berjadual atau perjalanan tidak berjadual ke atau dari suatu tempat di Malaysia di bawah terma mana-mana perjanjian atau perkiraan yang dibuat oleh Kerajaan;

“syarikat penerbangan yang berkontrak” ertinya suatu syarikat penerbangan dan mana-mana ejennya, yang menyempurnakan kontrak pengangkutan dengan seseorang penumpang;

“tiket” ertinya suatu dokumen atau apa-apa benda yang bersamaan dalam bentuk tanpa kertas, termasuk bentuk elektronik, yang dikeluarkan atau dibenarkan oleh suatu syarikat penerbangan yang berkontrak yang memberikan hak pengangkutan kepada pemegang tiket.

Caj perkhidmatan pengawalseliaan

3. (1) Tertakluk kepada peraturan 4, caj perkhidmatan pengawalseliaan sebagaimana yang ditetapkan dalam Jadual hendaklah dikenakan oleh Suruhanjaya bagi perkhidmatan pengawalseliaan yang diberikan oleh Suruhanjaya ke atas setiap penumpang yang berlepas dengan pesawat udara dari mana-mana aerodrom di dalam Malaysia.

(2) Caj perkhidmatan pengawalseliaan yang disebut dalam subperaturan (1) hendaklah kena dibayar oleh penumpang dan dikutip oleh syarikat penerbangan yang berkontrak—

- (a) apabila penumpang membeli tiket daripada syarikat penerbangan yang berkontrak itu; atau
- (b) apabila penumpang menyempurnakan apa-apa perjanjian dengan suatu syarikat penerbangan yang berkontrak bagi perkhidmatan pengangkutan udara.

(3) Syarikat penerbangan yang berkontrak hendaklah meremit caj perkhidmatan pengawalseliaan yang dikutip menurut subperaturan (2) kepada Suruhanjaya mengikut cara yang ditentukan oleh Suruhanjaya.

(4) Mana-mana syarikat penerbangan yang berkontrak yang melanggar subperaturan (3) melakukan suatu kesalahan dan boleh, apabila disabitkan, didenda tidak melebihi lima ratus ribu ringgit.

Pengecualian

4. Orang yang berikut dikecualikan daripada membayar caj perkhidmatan pengawalseliaan di bawah Peraturan-Peraturan ini:

- (a) penumpang dalam transit terus, iaitu, seseorang penumpang yang meneruskan perjalanan dalam penerbangan yang sama atau yang tidak dibenarkan untuk meninggalkan kawasan lapangan terbang yang dibenarkan untuk penggunaan penumpang dalam transit, atau yang dengan tidak sengaja ditangguhkan untuk dipindahkan kepada perkhidmatan tersedia yang berikutnya ke tempat mendarat yang berikut, disebabkan oleh cuaca atau pesawat udara yang tidak dapat digunakan;
- (b) kru sesuatu pesawat udara;
- (c) bayi di bawah umur dua tahun;
- (d) Ketua Negara, Menteri dan orang kenamaan lain yang melawat Malaysia dalam tugas rasmi mereka sebagai tetamu Kerajaan; dan
- (e) penumpang yang berlepas dengan syarikat penerbangan yang menyediakan perkhidmatan udara luar bandar menurut suatu perjanjian dengan Kerajaan.

Pembayaran balik

5. (1) Sesuatu syarikat penerbangan yang berkontrak hendaklah membayar balik caj perkhidmatan pengawalseliaan yang dikutip menurut subperaturan 3(2) kepada seseorang penumpang apabila dituntut oleh penumpang itu, jika penumpang itu tidak berlepas dari mana-mana aerodrom di dalam Malaysia.

(2) Bagi maksud membuat tuntutan bagi pembayaran balik daripada syarikat penerbangan yang berkontrak bagi caj perkhidmatan pengawalseliaan di bawah subperaturan (1), penumpang itu hendaklah mengemukakan tiket yang berkenaan dengan tuntutan itu yang telah dibeli daripada syarikat penerbangan yang berkontrak itu.

(3) Apa-apa caj perkhidmatan pengawalseliaan yang kekal tak dituntut oleh penumpang daripada syarikat penerbangan yang berkontrak bagi suatu tempoh tidak kurang daripada satu tahun selepas caj perkhidmatan kawal selia itu menjadi kena dibayar hendaklah dikira sebagai wang tak dituntut di bawah Akta Wang Tak Dituntut 1965 [*Akta 370*].